



客家語現代詩社會組 評審感言

陳寧貴

豐沛多彩个客語現代詩

1. 老屋

這首客語詩寫老屋，一氣呵成，寫到迴腸盪氣，雖有部分華式客語之小缺點，大體來講係不可多得个佳作。這首詩開頭用恁樣來描寫老屋：「夢中个老屋，係海面項等入港个船，在絲絨藍衫个海寶肚，滉激啊滉激，激出碎銀樣个浪花，係阿姆个乳水」，畫像一下間分人跌入頭擺懷念時光，老屋毋單只係老屋，係一切曩擺懷念个象徵。夢乜毋單只係夢，夢係盼望个象徵。作者意象一轉，過再深沉寫：「夢中个老屋，係爺，係哀，正身閃光个窗門，係厥等盼望个目珠，千盼萬等，眺望田坵个該頭，遠方開翼个子兒啊，哪久時，照得著若等轉屋个身影」，老屋係爺係哀，係盼望个目珠。毋過，老屋會舊陋，壁扇會必縫，親像係阿姆圓身个皺痕。到尾：夢中个老屋同阿姆無咧，山頭个塚埔，遠望野草莽生个老屋，風知得，代佢傳達這永久古老念想。——分讀者忍毋核同聲大道嘆！

2. 裁員

《裁員》關切社會現實面，分人感傷著驚：「一張紙仔膏在壁頂大字寫工廠因為仰般……因為仰般……故所愛……自家唸唸唸唸：偃毋信，有吾名！偃毋信，有吾名！仰會係偃！仰會係偃！」裁員个消息一公佈，得人驚个揚蝶仔效應，黏時就爆發開來：該央時，像分雷公打著，頭那暈暈腦痧痧，踩踩踏踏、打激顫講毋出話。食毋落、睡毋忒！惱起細人仔恁細，愛註冊、屋仔愛貸款、還愛過日仔…愛恁多錢！一屋大細擔頭還恁重！當得人畏！作者寫出被裁員者內心著驚盡深世界，乜講出大眾愛關懷个社會弱勢面相，本詩缺點係散文化，文字描寫做得可較精煉。

3. 電子輓聯——記叔公太个告別式

電子輓聯——記叔公太个告別式，寫出新時代个新詩，厥叔公太以前在世時節摻人寫輓聯，楷書字正正盡有禮貌，寫隸書，雁尾就像一支刀仔，痛心時節會割人心肝，無恹著現下叔公太个告別式，用个係電子輓聯同愛響毋響个電子紙炮，本詩優點係使用新題材寫出新時代變化，缺點係散文化。

結語

這屆參賽客語現代詩，毋單只客家族群，別个族群乜來參加。客語分較多社會大眾關心學習來書寫係盡好現象。這擺參賽作品大致水準當好。毋過，名次有限，難免遺珠之憾。參賽作品雖然有華客夾雜，用毋堵好客語字，感覺毋罇原汁原味，但係瑕不掩瑜，作者未來創作量增加後，定著會改善這兜缺點，使得作品客語文字過較精準。